

दिनांक 24.05.2025

समय: 18.45 बजे

आकाशवाणी जयपुर-अजमेर

- प्रधानमंत्री नरेन्द्र मोदी हर राज्य मांय सैर-सपाटा री कम ऊं कम एक ठौड वैश्विक मानकां रे मुजब विकसित करण बाबत् कह्यो
- मुख्यमंत्री भजन लाल शर्मा नीति आयोग री शासी परिषद री मीटिंग मांय केन्द्र सरकार ऊं राजस्थान मांय पाणी अर बिजली री सुरक्षा सारू और मदद देवण री अरज कीनीं
- प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेलं
- राज्य रा केई जिलां मांय आज आंधी चालण अर हल्की बारिश व्हेवण रा आसार-बीकानेर, फलौदी अर श्रीगंगानगर मांय लू रा हालात बण्या रेहवण री संभावनां
- 1857 री क्रांति री याद मांय कोटा मांय स्मारक बणायो जावेलं

000

प्रधानमंत्री नरेन्द्र मोदी हर राज्य मांय वैश्विक मानकां रे मुजब सैर-सपाटा री कम ऊं कम एक ठौड विकसित करण बाबत् कह्यो हैं वे आज नई दिल्ली मांय नीति आयोग री शासी परिषद री मीटिंग मांय बोल रह्या हां श्री मोदी कह्यो के **एक राज्य-एक वैश्विक गंतव्य** रा तहत सगळा सुबीता अर बुनियादी ढांचा विकसित कर्या जावणा चाहिजें प्रधानमंत्री कह्यो के ई सारू सरकार अर सगळा राज्यां ने मिल र टीम इंडिया री तरह काम करणो व्हेलां मीटिंग मांय केई राज्यां रा मुख्यमंत्री, केंद्र रा राज वाळा प्रदेशां रा उपराज्यपाल, केंद्रीय मंत्री अर नीति आयोग रा उपाध्यक्ष, सदस्य अर सी.ई. ओ. ई मौजूद रह्यां ई साल रा मुद्दो-**2047 तक विकसित भारत के लिए विकसित राज्य** हैं मुख्यमंत्री भजन लाल शर्मा ई भारत मण्डपम मांय व्ही ई मीटिंग मांय सिरकत कीनीं वे विकसित राजस्थान रो संकल्प पूरो करण सारू करी जा रही कोशिशों री चर्चा कीनीं ई दौरान वे प्रदेश मांय पाणी अर बिजली री सुरक्षा तैय करण बाबत् केन्द्र सरकार ऊं और मदद री अरज कीनीं मुख्यमंत्री पौंग बंधा मांय पाणी भरण रा बारा मांय बेगो ई फैसलो करण री अरज कीनी ताकि भागीदार राज्यां ने वां री पांती रो पाणी मिल सकें वे ई सागे ई कालीसिंध अर छबड़ा थर्मल परियोजनावां री और इकाईयां लगावण सारू नियमां मांय ढील देवण री ई मांग कीनीं

000

प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेलं आ हर महीना प्रसारित कर्या जावण वाळा ई कार्यक्रम री 122वीं कड़ी व्हेलां ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेलं ई सागे ई ओ कार्यक्रम आकाशवाणी समाचार री वेबसाइट, न्यूज ऑन एआईआर मोबाइल एप, आकाशवाणी समाचार, दूरदर्शन समाचार, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई प्रसारित कर्यो जावेलं

000

भारतीय रिजर्व बैंक सरकार ने दो लाख 68 हजार करोड़ रुपया ऊं बत्ती रकम रो लाभांश देवण री

मंजूरी दीनी हैं आरबीआई रो निदेशक मंडल माली साल 2024-25 सारु सरप्लस रा तौर ऊं आरकम देवण री मंजूरी दीनी हैं
मुंबई मांय आर.बी.आई. रा गवर्नर संजय मल्होत्रा री सदरत मांय व्ही बोर्ड री मीटिंग मांय ओ फैंसलो करी ज्यों आ आर.बी.आई. कानी ऊं सरकार ने लाभांश रा तौर ऊं दीरीजी हाल ताई री सब ऊं मोटी रकम हैं आ रकम लारला माली साल री तुलना मांय 27 फीसदी बत्ती हैं

000

पशुपालन विभाग री ओर ऊं प्रदेश रा आठ जिलां मांय बेगा ई सवा सौ पशु चिकित्सा अधिकारी अर 500 पशुधन निरीक्षक भर्ती कर्या जावेलां पशुपालन मंत्री जोराराम कुमावत बतायो के आं जिनावरां रा डॉक्टरां अर पशुधन निरीक्षकां री भर्ती अस्थाई तौर ऊं करी जावेलां श्री कुमावत बतायो के जोधपुर, फलौदी, बाड़मेर, बालोतरा, जैसलमेर, पाली, सिरोही अर जालौर जिलां मांय आं री नियुक्ति करी जावेलां इण रे जरिये भर्ती व्हेवण वाळा तीन महीना ताई या राजस्थान लोक सेवा आयोग ऊं चुणी ज्या उम्मीदवार उपलब्ध व्हेवण ताई काम कर सकेलां उम्मीदवार 31 मई ताई अर्जी दे सके हैं पशु चिकित्सा अधिकारी ओहदा सारु जयपुर रा पशुधन परिसर मांय अर्जियां दी जा सके हैं पशुधन निरीक्षक ओहदा सारु संबंधित जिला रा पशुपालन विभाग रा दफ्तर मांय अर्जी देवणी व्हेलां

000

जयपुर रा सवाईमानसिंह अस्पताल मांय गलत खून चढ़ावण रे कारण एक मरीज री मौत रा मामला री चिकित्सा मंत्री गजेन्द्र सिंह खींवर आरज विगतवार जाणकारी लीनीं एसएमएस मेडिकल कॉलेज रा अहलकारां सागे व्ही ई मीटिंग मांय स्वास्थ्य विभाग री प्रमुख सचिव गायत्री राठौड़ ई मौजूद रहीं मामला री जांच सारु चिकित्सा मंत्री मुकेश कुमार मीणा री अगुवाई मांय आला दर्जा री समिति बणायी हैं चिकित्सा मंत्री कह्यो के एस.एम.एस. ऊं जुड़्या सगळा अस्पतालां सारु एस.ओ.पी. जारी करी ज्यी है ताकि ऐड़ा मामला ओजू नी व्हे सकें

000

प्रदेश मांय पड़ रही जोरदार गर्मी बीचे आज 22 जिला मांय आंधी चालण अर गरज सागे बिरखा व्हेवण रा आसार है, हालांकि कुछ जिला मांय जबरदस्त गर्मी रो रेड अलर्ट ई जारी करी ज्यो हैं काल ऊं नौतपा रो जोर रहवण री संभावना हैं ई बीचे पुरवाई ऊं प्रदेश रा कुछ हलकां मांय आज जोरदार बायरो बाजण अर अंधड़ आवण रा आसार हैं जोधपुर मांय आज सिंज्यां आधा घंटा ताई जोरदार बायरो बाजण सागे तेज बिरखा व्ही बारां जिला रा शाहबाद हलका मांय दोपहरां पाछे गरज सागे थोड़ी देर ताई तेज बरसात व्हीं झालावाड़ मांय आंधी चाली अर केई हलका मांय बिरखा व्हीं मौसम केन्द्र जयपुर रा निदेशक राधेश्याम शर्मा बतायो के राज्य रा आतूणी हलकां मांय लू रा हालात बण्या रहवण रा आसार हैं आवता तीन दिन ताई बीकानेर, फलौदी अर श्रीगंगानगर मांय दिन मांय पड़ रह्या जोरदार तावड़ा सागे रात मांय ई तेज गर्मी रेहवण री संभावना हैं श्री शर्मा बतायो के आं ठौड़ां रात री बगत ई पारो 32 ऊं 34 डिग्री सेल्सियस बीचे रेहवण रा आसार हैं

.....

कोटपूतली-बहरोड़, चूरु अर बाड़मेर जिलां मांय ई जोरदार तावड़ो पड़ रह्यो हैं पाली जिला मांय पड़ रही जोरदार गर्मी ने ध्यान राखता थकां सुमेरपुर रा सिंहप्रस्थ तळाव मांय जिनावरां ने गर्मी ऊं बचावण सारु न्यारा-न्यारा संगठनां री ओर ऊं टैंकरां रे जरिये पाणी भरी ज्यों लारला चौबीस घंटां मांय जैसलमेर मांय अधिकतम तापमान 48 अर बाड़मेर मांय साढे 47 डिग्री सेल्सियस दर्ज करी ज्यों ई बीचे केरल मांय चौमासा री बिरखा सरु व्हे ग्यी हैं लारला 16 साल मांय पहली दफा दक्षिण-पश्चिम मॉनसून रा तैत चौमासा री बिरखा तैय बगत ऊं आठ दिन पैली सरु व्ही हैं केरल मांय चौमासा री बिरखा सामान्य तौर ऊं एक जून ताई सरु व्हे हैं मौसम विभाग रे मुजब मॉनसून आगे बधबा सारु हालात अनुकूल हैं

000

गृह राज्यमंत्री जवाहर सिंह बेढ़म डीग जिला रा नगर हलका मांय 11 ट्यूबवैल खुदवावण री मंजूरी दीनी हैं अ ट्यूबवैल रानौता, मानौता कलां अर सीकरी समेत न्यारा-न्यारा गांवां मांय सार्वजनिक ठौड़ा लगाया जावेलां श्री बेढ़म ई सागे ई नगर मांय पाणी री व्यवस्था और बेहतर बणावण सारु

चौबीस ठौड़ां सूरज री रोशनी ऊं चालण वाळा ट्यूब बैल लगावण री मंजूरी ई दीनीं ई काम माथे करीब दो करोड़ 65 लाख रुपया रो खर्चो आवेलां

000

सरिस्का बाघ अभ्यारण्य मांय प्लास्टिक अर पॉलिथिन कचरो भेळो कर्यो जा रह्यो हैं जंगली जिनावरा रे पॉलिथिन खा र मांदा व्हे जावण री शंका ने ध्यान रखता थकां आ मुहिम चलायी ज्यी हैं ई काम मांय बाघ मित्रां री मदद ई ली जावेलां

000

साल 1857 मांय व्ही आजादी री कांति री याद मांय कोटा मांय स्मारक बणायो जावेलां राजस्थान धरोहर प्रोन्नति प्राधिकरण रा अध्यक्ष ओंकार सिंह लखावत आज कोटा मांय ओ ऐलाण कीनों वे बतायो के राज्य सरकार आजादी री लड़ाई री खास-खास ठौड़ां ने विकसित करण री योजना बणायी है ज्यां मांय कोटा ई शामिल हैं श्री लखावत बतायो के एक करोड़ रुपया रा खर्चा रा अनुमान वाळो ओ स्मारक बेगो ई बणायो जावेलां

.....

000

राजस्थान सेंटर फॉर एडवांस्ड टेक्नोलॉजी –आर-कैट री ओर ऊं 3 जून ऊं जयपुर रा आर-कैट परिसर समर कैंप लगायो जावेलां आर-कैट री ओर ऊं छठी ऊं 12 वीं कक्षा तांई रा विद्यार्थियां सारू ओ कैंप लगायो जावेलां ओ कैम्प विद्यार्थियां ने तकनीक री दुनिया मांय दाखिल व्हेवण अर भविष्य सारू तैयार व्हेवण रो मौको व्हेलां इण रा तैत विद्यार्थियां ने ग्राफिक डिजाइन, वेबसाइट डेवलपमेंट, पायथन प्रोग्रामिंग, आर्टिफिशियल इंटेलिजेंस, वीडियो एडिटिंग अर कंटेंट क्रिएशन ऊं जुड़ी जाणकारी दी जावेलां ई सागे ही नो-कोड प्लेटफॉर्म रे मार्फत मोबाइल ऐप विकसित करण रा बारा मांय ई बतायो जावेलां

000

नशा मुक्त राजस्थान री सोच सांची करण रा मकसद ऊं चलाया जा रह्या कार्यक्रमों रा तैत आज पाली मांय कार्यशाला राखी ज्यीं इण मांय नशीला चीजां काम लेवण रा रा नुकसान रा बारा मांय जाणकारी दीरीजीं अजमेर मांय चिकित्सा विभाग रा कर्मचारी तम्बाकू मुक्त अभियान चलायो हैं ई रा तैत दफ्तरां अर स्कूलां मांय नशा मुक्ति री शपथ दिरावण रा कार्यक्रम राख्या जा रह्या हैं

000